



Giachen Giusep Monn-Curschellas

Nies car bab Giachen Giusep ei naschius ils 29 d'avrel 1925 sco secund affon da Turtè e Hans Giachen Monn-Beer.

Sia affonza ha el astgau passentar a Cavorgia ensemens cun 4 soras e 5 frars. Era la scola ha el astgau frequentar a Cavorgia. Suenter quei temps da scola eis el staus fumegli tier in puř, luvrer d'uaul e miradur.

1956 ha el maridau sia gronda carezia, l'Antonia Curschellas da Surrein. Ensemens cun sia consorta han els investau bia temps e lavur per baghegiar ora la casa dils Berthers a Camischolas. Quei ei lu daventau il dacasa per lur famiglia. Niessegner ha schenghegjau a lur lètg siat affons, quater buobs e treis buobas. Quels han els tratg si ensemens cun bia carezia e plascher.

Naven digl onn 1960 tochen sia pensiun igl onn 1990 ha nies bab luvrau tier l'ovra electrica NOK a Sedrun. El ha biaras gadas raquintau a nus affons plein luschezia da sia lavur ed era priu nus cun el giu en la ruosna tier las turbinas. Leu havein nus empriu dad ir cun velo ed il bab deva adina a nus ina tschugalata dil kiosk.

Sper sia lavur era il zambergiar cun lenn in da ses pli gronds hobis. Aschia eis ei sedau che ses affons e biadis han durmiu en tginas fatgas cun bia carezia, pazienzia ed exactedad da lur bab ni tat. En siu luvratori ha el creau massa bialas caussas ord sempels tocs lenn ed era reparau itschals, suppias ed aunc bia auter uorden per tut tgi che spluntava.

La stad haveva nies bab aunc in secund grond hobi, numnadamein esser apicultur. Cun maun ruasseivel e grond plascher fageva el la lavur en ualèr e mirava bein da ses aviuls.

Pér cun 50 onns ha nies bab empriu dad ir cun auto. Da quella decisiun eis el mai staus mal. Ensemens cun nossa famiglia e pli tard cun sia dunna ha el saviu far bia bials viadis e guder quella libertad.

Ils davos onns ha la sanadad da nossa cara mumma buca pli lubiu ad ella da star vinavon a casa. Nies car bab ei lu sedecidius dad ir ensemens cun ella en la casa d'attempai. El ha adina giu bien quitau da nossa mumma. Las visetas da ses affons, biadis e parentella fagevan adina ad el grond plascher.

Ils 9 da settember 2008 havein nus stuiu prender cumiau da nossa cara mumma. Quei ei stau per nies bab fetg, fetg grev. El ei sereratgs adina pli e pli fetg ed ei suandaus sia consorta bunamein exact sil di treis onns pli tard, ils 10 da settember 2011.

En casa s. Vigeli han nos geniturs astgau guder buna tgira ed ina emperneivla sera dalla veta. In cordial engraziament ad els persuenter.

Car bab

Nus engraziein a Ti per tut Tia lavur, Tiu bien quitau, Tia carezia e per tut ils bials muments ensemens cun Tei.

Ti has in ferm plaz en nies cor. Igl ei per nus consolond da saver che Ti eis ussa per adina unius cun Tia carezada dunna.

Ruaussa en pasch.

Tes affons